

## Ketidak-Terhadan Kemahuan Manusia Dalam Ekonomi Islam Arus Perdana<sup>1</sup>

**Mohd Zulkifli Muhammad**

Fakulti Keusahawanan dan Perniagaan

Universiti Malaysia Kelantan

P.O. Box: 36, Jalan Pengkalan Chepa

16100 Kota Bharu, Kelantan

E-mel: zulrider@yahoo.com

### **Abstrak**

*Kertas kerja ini bertujuan untuk meneliti tentang andaian sistem ekonomi Islam arus perdana yang mengatakan bahawa kemahuan manusia adalah tidak terhad (unlimited wants). Kajian ini cuba menganalisis andaian tersebut berdasarkan beberapa pandangan pakar ekonomi Islam arus perdana. Analisis kandungan dan kaedah perpustakaan digunakan dalam mencapai hasrat ini. Kajian ini mendapati bahawa andaian ekonomi Islam arus perdana tersebut diambil daripada ekonomi pro-lazim. Andaian tersebut diadunkan dengan sokongan sumber-sumber rujukan mutlak seperti Quran dan Hadis agar wujud ciri-ciri keislaman di dalam andaian tersebut. Implikasi daripada dapatan kajian ini ialah perlunya satu kajian yang komprehensif dilakukan bagi membina satu resolusi baru dalam andaian ekonomi Islam yang betul.*

*Kata Kunci:* andaian ekonomi Islam arus perdana, kemahuan manusia adalah tidak terhad.

### **Pendahuluan**

Ekonomi Islam arus perdana telah menceduk beberapa andaian daripada ekonomi lazim. Lalu dijadikan konsep yang serupa dan sah dalam ekonomi Islam arus perdana. Cuma ianya dilapisi dengan elemen-elemen Islam agar menampakkan ianya Islamik. Andaian yang dimaksudkan ialah keterhadan sumber alam dan ketidak-terhadan kemahuan manusia. Kertas kerja ini bertujuan membincangkan tentang salah satu andaian yang terdapat dalam ekonomi Islam arus perdana iaitu ketidak-terhadan kemahuan manusia.

Secara khususnya, kertas kerja ini cuba untuk meneliti kajian-kajian lepas yang tertumpu kepada andaian bahawa kemahuan manusia adalah tidak terhad. Andaian ini hanya tertakluk dalam konteks ekonomi Islam arus perdana sahaja. Adakah benar kemahuan manusia tiada had? Adakah ianya boleh dikawal? Sekiranya boleh, adakah mekanisme tertentu yang dapat mengawalnya? Soalan-soalan ini yang berlegar apabila perbahasan

---

<sup>1</sup> Kertas kerja ini dibentangkan di Workshop Antarabangsa Pembangunan Berteraskan Islam VI (WAPI-6) yang dianjurkan oleh Universitas Muhammadiyah Sumatera Utara (UMSU), Medan, Indonesia dengan kerjasama Pusat Kajian Pengurusan Pembangunan Islam (ISDEV), Universiti Sains Malaysia, Pulau Pinang pada 21 - 27 April 2013 bertempat di Medan, Indonesia.

tentang ketidak-terhadan kemahuan manusia dibahaskan oleh sarjana ekonomi Islam arus perdana.

Untuk itu, satu tinjauan literatur yang bertumpukan hasil penulisan sarjana ekonomi Islam yang berkaitan andaian ketidak-terhadan kemahuan manusia telah dijalankan merangkumi sumber bercetak dan elektronik. Namun demikian, tinjauan literatur ini hanya bertumpu kepada bahan-bahan yang ditulis sama ada dalam bahasa Inggeris dan bahasa Melayu sahaja. Bahan-bahan berkaitan yang ditulis dalam bahasa selain daripada kedua-dua bahasa ini tidak diambilkira untuk tinjauan literatur yang bersifat pengenalan ini. Begitu juga dengan analisis pandangan sarjana ekonomi Islam arus perdana ini tidak dibuat secara keseluruhan, tetapi diambil beberapa pandangan sahaja.

Kertas kerja ini dimulai dengan pendahuluan. Seterusnya dilanjutkan kepada definisi dan konsep andaian ketidak-terhadan kemahuan manusia berdasarkan pendefinisian daripada beberapa sarjana ekonomi lazim dan Islam. Seterusnya diteruskan dengan perbincangan literatur tentang andaian dalam ekonomi Islam arus perdana; ketidak-terhadan kemahuan manusia (*unlimited wants*) sebelum diakhiri dengan kesimpulan.

### **Definisi dan Konsep Ketidak-Terhadan Kemahuan Manusia (*Unlimited Wants*)**

#### **a. Ketidak-terhadan Kemahuan Manusia Menurut Ekonomi Lazim**


Menurut ekonomi lazim, ketidak-terhadan kemahuan manusia adalah salah satu konsep utama yang terkandung dalam sains ekonomi. Ianya saling berkait rapat dengan konsep keterhadan sumber alam. Maka, akan pincanglah perbincangan ketidak-terhadan kemahuan manusia sekiranya tidak dilibatsama akan konsep keterhadan sumber alam. Menurut Alfred Marshall (1890), ekonomi lazim wujud supaya dapat menyediakan teori dan praktis ke arah menyelesaikan masalah pemilihan manusia dalam keadaan keterhadan sumber. Oleh yang demikian, menurut Kahneman et. al. (1986) berpendapat bahawa konsep kebebasan pemilihan manusia yang tiada batasnya memerlukan sumber alam digembleng dengan cekap. Ini bertujuan supaya kepuasan kehendak manusia dapat dipenuhi.

Sekiranya diteliti pendefinisian dan konsep yang diberikan oleh ekonomi lazim, penulis dapati mereka membenarkan kemahuan yang tidak terhad tersebut. Matlamat utama mereka adalah agar manusia dapat mencapai kepuasan dalam aktiviti perekonomian ditahap paling maksimum. Dalam hal ini, fokus perbahasan yang paling utama bagi mereka adalah konsep kepuasan individu. Kepuasan individu dalam konteks bagaimana manusia yang dianggap rasional cuba untuk memuaskan kehendak masing-masing berdasarkan sumber terhad yang mereka miliki.


#### **b. Ketidak-terhadan Kemahuan Manusia Menurut Ekonomi Islam Arus Perdana**

Pendefinisian dan konsep ketidak-terhadan kemahuan manusia dalam ekonomi Islam arus perdana pula tidak jauh bezanya dengan definisi dan konsep yang diberikan oleh ekonomi lazim. Ekonomi Islam arus perdana menggabungkan elemen dunia dan akhirat dalam membincangkan akan hal ini. Menurut Magda Ismail Abdel Mohsin (2007), ketidak-

terhadan kemahuan manusia wujud dalam kedua-dua kehidupan. Kehidupan yang dimaksudkan ialah kehidupan dunia dan kehidupan akhirat. Namun, ketidak-terhadan kemahuan umat manusia yang berlaku di dunia yang membawa masalah kepada keterhadan sumber alam. Walhal, ketidak-terhadan kemahuan ini tidak membawa sebarang masalah sekiranya berlaku di alam akhirat. Rajah-rajab di bawah menjelaskan dengan lebih lanjut perkaitan keterhadan sumber alam dengan masalah ketidak-terhadan kemahuan manusia.



Rajah 1.1: Keterhadan Sumber Alam Relatif



Rajah 1.2: Keterhadan Sumber Alam Sifar

Rajah-rajab di atas menunjukkan permasalahan ketidak-terhadan kemahuan manusia dan keterhadan sumber alam yang berlaku dalam dua alam. Alam dunia dan alam akhirat. Rajah 1.1 menggambarkan ketidak-terhadan kemahuan manusia berlaku dalam keadaan sumber alam yang terhad. Fenomena ini mendorong kepada kewujudan masalah pemilihan dalam barang dan perkhidmatan. Manusia akan cuba membuat pilihan yang terbaik bagi mereka (Abdel Rahman Yousri Ahmed, 2002; Wahbalbari Amir Ahmed, 2010:148 dan Khurshid Ahmad, 1992:39-40). Akan tetapi, keterhadan yang berlaku hanyalah bersifat relatif.

Menurut Zubair Hassan (2011:8) fakta tentang „*kewujudan* sumber yang tidak terhad untuk semua makhluk pada setiap masa dan tempat” dan fakta bahawa „*ketersediaan* sumber untuk seseorang individu atau kumpulan pada masa dan lokasi tertentu serta dalam kuantiti yang diperlukan” adalah suatu yang berbeza. Ianya bukan masalah kewujudan sumber, akan tetapi masalah ketersediaan sumber yang menjadi pangkal isu utama dan konsep kepada wujudnya andaian sumber adalah terhad secara relatif. Ini mendorong berlakunya masalah pemilihan yang ditambah dengan anggapan bahawa kemahuan manusia tiada batasnya. Tambah Zubair Hassan (1996:582) lagi, ketersediaan sumberlah yang menjadi fungsi kepada pengetahuan-pengetahuan tentang kewujudannya, bagaimana cara mendapatkannya, cara menggunakan dan kos-kos yang terlibat dalam proses tersebut.

Sementara itu, rajah 1.2 pula membicarakan tentang konsep ketidak-terhadan kehendak yang berlaku di alam akhirat. Alam akhirat di sini merujuk kepada syurga. Dalam alam akhirat, kedua-dua masalah kemahuan dan sumber alam tidak berlaku sama sekali. Ini kerana, Allah SWT sudah menjanjikan bahawa manusia boleh memiliki apa sahaja di akhirat walau sebesar mana pun nafsu kemahuan dan kehendak mereka. Apabila sumber alam tidak terbatas, maka sudah tentu manusia yang sememangnya memiliki kemahuan tidak terbatas juga tidak mengalami sebarang masalah dalam membuat pemilihan. Oleh yang demikian, masalah pemilihan di alam ini adalah sifar (Muhammad Nejatullah Siddiqi, 2005).

Dapat disimpulkan di sini bahawa, kewujudan masalah dalam ketidak-terhadan kemahuan manusia hanya wujud di alam dunia semata-mata. Hal ini berlaku kerana disumbangkan oleh faktor keterhadan sumber alam yang dianggap oleh ekonomi Islam arus perdana sebagai wujud secara relatif di dunia. Tetapi tidak wujud di alam akhirat.


### **Kajian Literatur Terhadap Ketidak-Terhadan Kemahuan Manusia (Unlimited Wants)**

Sebenarnya andaian ketidak-terhadan kemahuan manusia tidak banyak diperbincangkan oleh sarjana ekonomi Islam arus perdana. Kalau ada pun, perbincangan lebih tertumpu kepada andaian keterhadan sumber alam. Dalam perbahasan tentang keterhadan sumber alam, sarjana ekonomi Islam arus perdana seringkali mengaitkannya dengan andaian ketidak-terhadan kemahuan manusia dalam memperjelaskan justeru memperkuuhkan lagi isu sumber alam yang terhad.

Oleh yang demikian, dalam kajian ini penulis hanya lontarkan beberapa sahaja perbahasan tentang ketidak-terhadan kemahuan manusia ini. Perlu dinyatakan lebih awal, kebanyakan perbahasan akan andaian ini diperbincangkan secara tidak langsung sahaja. Ianya tidak dapat lari daripada menyentuh serba sedikit andaian sumber alam yang terhad. Dalam kajian ini, penulis dapat kenalpasti beberapa sarjana ekonomi Islam yang membincangkan andaian ketidak-terhadan kemahuan manusia ini. Sarjana yang dimaksudkan adalah Magda Ismail Abdel Mohsin (2007), Rasul Shams (2004), Daniel E. Price (1999), Muhamad Ichsan & Jafril Khalil (2007), Muhammad Syukri Salleh (2003), Muhammad Nejatullah Siddiqi (2005), Zubair Hasan (2005), Wahbalbari Amir Ahmed (2010), Zubair Hasan & M. Fahim Khan (1985), Zubair Hasan & Munawar Iqbal (1990), M. Fahim Khan (1995).

Kajian yang dilakukan oleh Magda Ismail Abdel Mohsin (2007) mengaitkan ketidak-terhadan kemahuan manusia kepada pemilihan yang dilakukan oleh manusia. Pandangan ini juga sama dengan yang diutarakan oleh Price (1999). Dalam proses pemilihan ini, ia haruslah berdasarkan kepada keperluan dan kehendak seseorang. Menurut Magda Ismail Abdel Mohsin (2007) lagi, konsep pemilihan terbahagi kepada dua seperti dalam rajah di bawah. Pilihan yang dibuat oleh manusia dan sifat manusia itu sendiri menurut perspektif Islam. Bagi maksud kajian ini, fitrah dan konsep manusia dalam Islam tidak dinyatakan secara terperinci.

Pemilihan terhadap keperluan dan kehendak manusia yang bergelar Islam perlu berlandaskan kepada *Syariah Islamiyyah*. Secara lebih terperinci, pemilihan mereka terbahagi kepada dua. Pertama ialah sejauh mana kemahuan manusia ingin membelanjakan harta dan pendapatan ke arah keperluan dunia. Kedua ialah sejauh mana kemahuan manusia ingin membelanjakan harta dan pendapatan ke jalan Allah SWT (*infaq fi sabillah*). Pandangan ini juga sama dengan apa yang diutarakan oleh Muhamad Ichsan & Jafril Khalil (2007). Menurut Muhamad Ichsan & Jafril Khalil (2007), umat Islam disarankan agar membelanjakan harta dan pendapatan ke jalan yang direhui Allah SWT.



Rajah 1.3: Pemilihan dalam Islam

Kajian yang dilakukan oleh Rasul Shams (2004) lebih tertumpu kepada nafsu dan sikap seseorang dalam perkaitannya dengan ketidak-terhadan kemahuan manusia. Menurut beliau, terdapat perbezaan antara ekonomi pasaran yang dibentuk oleh tingkah laku seseorang individu yang tidak mengenal erti batasan dalam sikap moral dan satu lagi dibentuk oleh satu tingkah laku orang Islam, yang mengikut kod etika Islam. Oleh itu, antara salah satu ciri ekonomi Muslim yang dapat mengawal nafsu mereka. Ini amat berbeza sekali dari segi fungsi ekonomi jika dibandingkan dengan ekonomi lazim yang tidak mengambil kira pengawalan nafsu. Untuk memahami perbezaan ini, penting bagi seseorang itu untuk mengetahui apa yang dimaksudkan dengan konsep nafsu dalam Islam. Satu takrifan yang mudah adalah dengan menggambarkan nafsu sebagai entiti dalaman manusia, yang telah lupa kepada Allah dan hanya mencari kepuasan di dunia semata-mata.

Kebanyakan kajian tentang ekonomi bermula dengan satu pernyataan yang sama. Pernyataan tersebut ialah ekonomi adalah satu sains yang meneliti fungsi ekonomi di mana individu dianggap mempunyai nafsu yang tidak terbatas. Bagi nafsu tersebut, kemahuannya terhadap harta dunia adalah tidak terhad. Akan tetapi, pernyataan dalam ekonomi Islam arus perdana ini dilihat seolah-olah sama dengan kenyataan ekonomi lazim. Beberapa petikan daripada karya-karya ekonomi lazim boleh diperhatikan dibawah:

*"Ekonomi adalah satu kajian tentang bagaimana manusia, secara individu dan kolektif memperuntukkan sumber yang terhad bagi memenuhi kemahuan mereka yang tidak terhad"* (Byrns & Stone, 1995:5).

*"Kehendak manusia adalah hampir tidak terhad, sedangkan sumber yang ada untuk memenuhi kehendak ini adalah terhad"* (Sloman, 2000:2).

*"Adalah realistik untuk menganggap bahawa persepsi kepuasan manusia berubah mengikut kepada perubahan ekonomi mereka, lebih banyak harta yang mereka ada maka lebih besar kemahuan mereka"* (Schumann et al. 1999:6).

*"Untuk berekonomi bermaksud mengorbankan sebanyak mungkin kemahuan mereka yang tidak terhad bagi mengimbangi sumber yang terhad yang boleh memberi kepuasan kepada mereka"* (Bontrup, 1998:29).

Akan tetapi, sebagai seorang Muslim, yang dapat mengawal nafsunya memiliki kemahuan yang terhad dan sumber-sumber untuk memenuhi kemahuan yang terhad ini termaktub dalam garis panduan Islam. Seperti yang dinyatakan dalam Surah Hud:

*"Dan tiadalah sesuatupun dari makhluk-makhluk yang bergerak di bumi melainkan Allah jualah yang menanggung rezekinya dan mengetahui tempat kediamannya dan tempat ia di simpan. Semuanya itu tersurat di dalam Kitab (Lauh Mahfuz) yang nyata (kepada malaikat-malaikat yang berkenaan)"* (Hud:6).

Oleh yang demikian, orang Islam tidak diganggu dalam tatacara hidup kerana mereka sentiasa berusaha ke arah memastikan perbelanjaan dan tahap kepuasan hidup mereka berada di landasan yang dibenarkan oleh syarak. Ini adalah perbezaan asas daripada konsep aktiviti ekonomi seperti yang dinyatakan dalam petikan ayat 6 dalam surah Hud jika dibandingkan dengan petikan daripada karya-karya ekonomi lazim di atas.

Menurut Rasul Shams (2004:5-6) lagi, manusia yang mempunyai kemahuan tidak terbatas akan berasa tamak kerana mereka tahu tiada had dalam keinginan dan sentiasa tamak walaupun sumber terhad. Setiap kali satu kemahuan dapat dipenuhi, kemahuan lain akan muncul. Lalu mereka akan berasa tertekan untuk memenuhi kemahuan baru tersebut. Ketika mereka beroleh kepuasan, dalam masa yang sama akan terbina perasaan kekurangan dalam diri mereka. Oleh yang demikian, perasaan tidak puashati akan muncul. Dalam proses ini, mereka sentiasa sibuk dengan persoalan bagaimana untuk menggerakkan sumber-sumber yang terhad bagi memenuhi kemahuan baru. Mereka tidak pernah berada dalam keadaan yang tenang dan cukup. Berbeza dengan orang Islam, mereka mempunyai kemahuan yang sederhana, sentiasa berpuashati dengan fikiran yang tidak terganggu. Kemahuan mereka adalah terhad kerana sedar akan hakikat bahawa mereka adalah khalifah untuk memakmurkan bumi ini dengan perintah Allah S.W.T.

Mereka juga menggunakan sumber-sumber yang cukup untuk memenuhi kemahuan yang terhad itu (Rasul Shams, 2004:5).

Kajian yang berkaitan dengan pengawalan nafsu ini adalah sama dengan kajian yang dilaksanakan oleh Muhammad Syukri Salleh (2003:13). Perbezaannya adalah pada membicarakan bagaimana nafsu boleh membawa kepada ketidakbatasan kehendak manusia pada kajian Rasul Shams (2004). Akan tetapi, kajian Muhammad Syukri Salleh (2003) lebih kepada membicarakan tingkat-tingkat nafsu baik dan jahat dan bagaimana mengawalnya. Menurut Muhammad Syukri Salleh (2003:13), walaupun nafsu manusia sentiasa melonjak untuk meningkat kehendak kebendaan, tetapi ajaran Islam yang berkaitan dengan penggunaan dan pengeluaran dapat menahan nafsu tersebut. Oleh sebab itu, menurut beliau kemahuan yang tidak terhad itu merupakan manifestasi kepada bermaharajalelanya nafsu jahat *ammarah* atau *lawwamah* atau *mulhamah* di dalam jiwa manusia. Apabila nafsu *ammarah*, *lawwamah* dan *mulhamah* ini dapat dibaiki dan manusia dapat mencapai nafsu yang baik seperti *mutmainnah* dan lebih-lebih lagi nafsu *radhiyah*, *mardhiyyah* dan *kamilah*, kemahuan manusia itu dapat dihadkan (Muhammad Syukri Salleh, 2003:13).

Satu lagi kajian yang dilakukan oleh Wahbalbari Amir Ahmed (2010:148). Beliau menyentuh sedikit tentang ketidak-terhadan kemahuan manusia dalam huraiannya berkaitan sumberdaya yang terhad. Menurut beliau, keterhadan sumberdaya adalah masalah kemahuan manusia yang tidak terbatas dalam konteks sumber alam yang terbatas. Ini bermaksud, sama ada manusia memang tidak mempunyai sumber alam yang mencukupi bagi memenuhi kemahuan dan keperluan manusia. Ataupun tidak semua kemahuan dapat dipenuhi dalam sesuatu masa. Jadi timbal-balas (*trade-off*) harus berlaku dalam memilih sesuatu barang dan perkhidmatan dan melepaskan barang dan perkhidmatan yang lain. Kajian ini dilihat bersamaan dengan apa yang disebut oleh Magda Ismail Abdel Mohsin (2007). Magda Ismail Abdel Mohsin (2007) ada menyentuh akan konsep pemilihan. Pemilihan barang dan perkhidmatan amat bergantung kepada kemahuan seseorang. Jika manusia tidak dapat mengawal kemahuannya, maka besarlah pemilihan barang dan perkhidmatan tersebut. Sehingga ianya boleh melampaui batas-batas agama. Akan tetapi, sekiranya kemahuan tersebut dapat dikawal dengan berdasarkan kepada ajaran Islam, maka manusia hanya memerlukan barang dan perkhidmatan yang difikirkan perlu sahaja. Konsep ini juga dipanggil sebagai bersederhana dalam penggunaan dan berbelanja di jalan Allah SWT (Magda Ismail Abdel Mohsin, 2007).

Berlainan pula dengan kajian yang dilakukan oleh Muhammad Nejatullah Siddiqi (2005) tentang kemahuan terhadap barang dan perkhidmatan. Kajian yang dilaksanakan oleh Magda Ismail Abdel Mohsin (2007), Rasul Shams (2004), Daniel E. Price (1999), Muhamad Ichsan dan Jafril Khalil (2007) hanya menyentuh kemahuan terhadap barang dan perkhidmatan yang berbentuk fizikal. Muhammad Nejatullah Siddiqi (2005) berpendapat wujud satu lagi kemahuan yang tidak dapat dilihat dan dipegang. Menurut beliau, seseorang seharusnya boleh membezakan keperluan yang dapat dipuaskan dengan barang dan perkhidmatan yang boleh diukur dan boleh dipasarkan daripada yang tidak dapat diukur. Seperti cinta, kasih sayang, rasa kekitaan dan lain-lain. Walau bagaimanapun, sistem ekonomi sekarang hanya memperkatakan jenis yang pertama sahaja. Walhal, jenis kedua juga perlu diambilkira dan dikupas dengan lebih mendalam.

Adalah perlu untuk memberi perhatian kepada keperluan dan kepuasan yang pertama. Ini kerana aktiviti-aktiviti ekonomi individu dan masyarakat lebih terarah kepada memenuhi keperluan dan kepuasan jenis yang pertama, iaitu yang boleh diukur. Islam amat menitikberatkan kepada keperluan dan kepuasan secara universal. Oleh itu, jenis kedua iaitu yang tidak boleh diukur harus juga diberi perhatian yang besar. Sesiapa saja boleh bercakap mengenai keperluan. Seperti membicarakan konsep keperluan yang dilontarkan oleh ulama Islam, terutama oleh al-Shatibi. Dan juga hasil kajian terkini sarjana ekonomi Islam tentang ekonomi kemanusiaan, ekonomi sosial dan etika dalam ekonomi<sup>3</sup>. Tetapi, haruskah teori ekonomi Islam mengabaikan keperluan yang tidak disokong oleh konsep dalam aktiviti ekonomi secara zahiriah seperti teori kuasa beli. Dan memberi tumpuan hanya kepada 'kemahuan secara lahiriah'? Atau adakah hanya memberi fokus kepada pasaran semata-mata tanpa peduli tentang 'kemahuan secara lahiriah'. Teori ekonomi Islam bukanlah merujuk kepada pasaran sahaja. Sifatnya sebagai ilmu sains sosial memerlukan peduli yang lebih diberikan kepada matlamat-matlamat masyarakat. Antaranya keperluan dan kepuasan secara universal (Muhammad Nejatullah Siddiqi, 2005).

Antara ramai sarjana ekonomi Islam yang mengkaji andaian ketidak-terhadan kemahuan manusia, kajian Zubair Hasan dilihat lebih banyak (Zubair Hasan & M. Fahim Khan, 1985; Zubair Hasan & Munawar Iqbal, 1990; Zubair Hasan, 1996, 2002, 2005 dan 2011). Dalam kajian-kajian tersebut, kajian Zubair Hasan (2005) lebih menjurus kepada andaian ini. Selainnya banyak menghuraikan tentang keterhadan sumber alam yang dikaitkan dengan ketidak-terhadan kemahuan manusia secara tidak langsung. Menurut Zubair Hasan (2005:31), manusia secara semulajadi berkehendakkan kepada kepuasan dan bukannya kesusaahan. Fitrah inilah yang membentuk kemahuan manusia dalam sistem ekonomi Islam arus perdana. Kemahuan dianggap sebagai tidak terhad. Kebanyakan kemahuan ini dapat dipuaskan tetapi akan berulang semula. Ciri inilah yang menyebabkan kemahuan kekal memberi tekanan kepada manusia agar dipuaskan lagi. Lalu memberi cetusan kepada manusia untuk bekerja keras bagi mendapatkan kepuasan kembali. Kenyataan ini juga digambarkan dalam ayat al-Quran seperti di bawah:

*"Sesungguhnya Kami telah jadikan manusia sentiasa dalam keadaan menghadapi kesulitan dan kesukaran (jasmani dan rohaninya)." (al-Balad:4)*

*"Dan Dialah (Allah) yang menjadikan (untuk kamu) kebun-kebun yang menjalar tanamannya dan yang tidak menjalar dan pohon-pohon tamar dan tanam-tanaman yang berlainan (bentuk, rupa dan) rasanya dan buah zaitun dan delima, yang bersamaan (warnanya atau daunnya) dan tidak bersamaan (rasanya). Makanlah dari buahnya ketika ia berbuah, dan keluarkanlah haknya (zakatnya) pada hari memetik atau menuainya dan janganlah kamu melampau-lampau (pada apa-apa juadah yang kamu makan atau belanjakan) sesungguhnya Allah tidak suka kepada orang-orang yang melampau lampau." (al-An'aam:141)*

*"Wahai anak-anak Adam! Pakailah pakaian kamu yang indah berhias pada tiap-tiap kali kamu ke tempat ibadat (atau mengerjakan sembahyang), dan makanlah serta minumlah, dan*

---

<sup>3</sup> Abu Ishaq al-Shatibi (790H/1388AD) terkenal dengan kajiannya tentang matlamat Syariah. Untuk pembacaan lanjut tentang kajian al-Shatibi boleh merujuk kepada Mohammad Khalid Masud (1977). *Islamic Legal Philosophy, A Study of Abu Ishaq al Shatibi's Life and Thought*, Islamabad: Islamic Research Institute.

*jangan pula kamu melampaui-lampau sesungguhnya Allah tidak suka akan orang-orang yang melampaui batas." (al-A'raaf:31)*

Akan tetapi, perbincangan secara lebih terperinci seperti definisi kemahuan, ciri-ciri, fitrahnya tidak dibincangkan dalam ilmu ekonomi Islam arus perdana. Apa yang biasa dibincangkan hanyalah kategorinya sahaja. Kajian yang diutarakan oleh Zubair Hasan (2005) ini banyak menyokong apa yang telah dikaji oleh Muhammad Syukri Salleh (2003), Rasul Shams (2004) dan M. Fahim Khan (1995). Menurut Zubair Hasan lagi (2005:31-32), hubungan antara ketidak-terhadan kemahuan manusia dan keterhadan sumber alam telah menjadi isu yang utama dalam konsep pemilihan manusia. Ianya menjadi asas kepada ekonomi lazim dan ekonomi Islam arus perdana<sup>4</sup>. Beliau berpendapat, kebanyakannya pendapat sarjana dalam ekonomi Islam arus perdana masih lagi terikat dengan teori ekonomi lazim. Terikat dalam erti kata kemahuan manusia tiada batasnya. Sedangkan ianya dapat dikawal dengan panduan Syariah.

## Kesimpulan

Kertas kerja ini telah membincangkan pandangan sarjana ekonomi Islam terhadap isu ketidak-terhadan kemahuan manusia (*unlimited wants*) dengan penghujahan yang disokong pula oleh sumber mutlak al-Quran. Terdapat dua kelompok ahli ekonomi Islam dalam isu ini. Kelompok pertama, mengambil pandangan ekonomi lazim terhadap andaian ini lalu diIslamisasikan. Kelompok kedua pula, ahli ekonomi Islam yang menentang pandangan kelompok pertama lalu menyarankan agar ianya hendaklah berpaksikan kepada ketauhidan terhadap Allah S.W.T. dan selari dengan tasawur Islam. Berdasarkan kajian-kajian terdahulu, pelbagai isu berkaitan andaian ketidak-terhadan kemahuan manusia telah dikemukakan para pengkaji.

Namun, walau apapun aspek yang dilontarkan, asas perbincangan sebahagian besar kajian sebenarnya bersandarkan kepada kenapa ketidak-terhadan kemahuan manusia ini boleh berlaku. Ini adalah dalam skop ekonomi Islam arus perdana. Kajian-kajian yang telah dilaksanakan dilihat cuba meneliti dan menilai sebab dan akibat ketidak-terhadan kemahuan manusia. Penekanan kajian mereka banyak tertumpu kepada kategori konsep kemahuan dan aspek bagaimana untuk mengawal kemahuan tersebut.

Walau bagaimanapun, satu aspek yang tidak begitu ditekankan dalam kajian-kajian ini adalah perlukah andaian ini dalam konteks ekonomi Islam. Adakah perlu memasukkan andaian yang berasal dari ekonomi lazim ini ke dalam falsafah ekonomi Islam. Sekiranya perlu, adakah ianya selari dengan konsep ketauhidan kepada Allah S.W.T. dan tasawur Islam yang sebenar? Apakah Allah sengaja menciptakan ketidak-terhadan kemahuan dalam diri manusia? Adakah wujud satu resolusi atau rumusan baru terhadap andaian ini yang betul-betul mencerminkan ekonomi Islam yang berpaksikan kepada ketauhidan terhadap Allah dan selari dengan tasawur Islam? Oleh yang demikian, perbincangan yang lebih mendalam lagi komprehensif ke arah mencapai satu resolusi baru terhadap andaian ini haruslah dilaksanakan oleh ahli ekonomi Islam agar ianya selaras dengan konsep ketauhidan kepada Allah S.W.T. dan tasawur Islam yang sebenar, tidak sekadar hanya tempelan daripada ekonomi lazim.

<sup>4</sup> Dalam kedua-dua andaian ini, andaian keterhadan sumber alam paling banyak dibincangkan. Sama ada oleh sarjana ekonomi Islam arus perdana mahupun sarjana ekonomi anti-lazim.

## Bibliografi

- Abdel Rahman Yousri Ahmed (2002). "A Methodological Approach to Islamic Economics: Its Philosophy, Theoretical, Construction, and Applicability", dalam Habib Ahmed, ed., *Theoretical Foundations of Islamic Economics*, Book of Readings No. 3, Jeddah, Arab Saudi: Islamic Research and Training Institute, Bank Pembangunan Islam.
- Alfred Marshall (1890). *Principles of Economics*, New York: MacMillan.
- Bontrup, H. J. (1998). *Volkswirtschaftslehre*, Munich: R. Oldenbourg Verlag.
- Byrns, R. T. dan Stone, G. W. (1995). *Economics*, New York: Harper Collins.
- Kahneman, D., Knetsch, J. L., dan Thaler, R. H. (1986). "Fairness and the Assumptions of Economics", *Journal of Business*, 285-300.
- Khurshid Ahmad (1992). "Nature and Significance of Islamic Economics", in Ausaf Ahmad and Kazim Raza Awan (1992). *Lectures on Islamic Economics*, Kertas Kerja dan Prosiding International Seminar on 'Teaching Islamic Economics for University Teachers', Jeddah, Arab Saudi: Islamic Research and Training Institute, Bank Pembangunan Islam.
- M. Fahim Khan (1995). *Essays in Islamic Economics*, UK: Islamic Foundation.
- M. Fahim Khan (2002). "Fiqh Foundations of the Theory of Islamic Economics: A Survey of Selected Contemporary Writings on Economics Relevant Subjects of Fiqh", dalam Habib Ahmed, ed., *Theoretical Foundations of Islamic Economics*, Book of Readings No. 3, Jeddah, Arab Saudi: Islamic Research and Training Institute, Bank Pembangunan Islam.
- Magda Ismail Abdel Mohsin (2007). *Islamic Economics*, Kuala Lumpur: INCEIF.
- Mohammad Khalid Masud (1977). *Islamic Legal Philosophy, A Study of Abu Ishaq al-Shatibi's Life and Thought*, Islamabad: Islamic Research Institute.
- Muhamad Ichsan dan Jafril Khalil (2007). "Shari'ah Financial Planning Concept", kertas kerja yang dibentangkan di *FPSB Education Advisory Panel*, Seattle, Washington Meeting, 6-7 September.
- Muhammad Nejatullah Siddiqi (2005). *Teaching Islamic Economics*, Jeddah: King Abdulaziz University Islamic Economics Research Centre.
- Muhammad Syukri Salleh (2003). *7 Prinsip Pembangunan Berteraskan Islam*, Kuala Lumpur: Zebra Editions dan Pulau Pinang: Projek Pengurusan Pembangunan Islam (IDMP), Universiti Sains Malaysia.
- Price, D. E. (1999). *Islamic Political Culture, Democracy, and Human Rights: A Comparative Study*, Connecticut: Praeger Publishers.
- Rasul Shams (2004). *A Critical Assessment of Islamic Economics*. HWWA Discussion Paper 281, Hamburg Institute of International Economics, Hamburg, Germany.
- Schumann, J., Meyer,U., Ströbele, W. (1999). *Grundzüge der Mikroökonomischen Theory*, Berlin: Springer.
- Sloman, J. (2000). *Economics*, London: Prentice Hall.
- Surtahman Kastin Hassan (1990). *Ekonomi Islam*, Bangi, Selangor: Penerbit Universiti Kebangsaan Malaysia.
- Surtahman Kastin Hassan dan Sanep Ahmad (2010). *Ekonomi Islam: Dasar dan Amalan*, Kuala Lumpur: Dewan Bahasa dan Pustaka.

- Wahbalbari Amir Ahmed (2010). "The Concept of Scarcity and Its Implication on Human Behaviour: Searching the Qur'anic Perspective", *Review of Islamic Studies*, 14 (1), 147-171.
- Zubair Hasan (1996). "An Introduction to Islamic Economics", *American Journal of Islamic Social Sciences*, 13(4), 580-585.
- Zubair Hasan (2002). "Maximization Postulates and their Efficacy for Islamic Economics", *American Journal of Islamic Social Sciences*, 19(3), 95-118.
- Zubair Hasan (2005). "Treatment of Consumption in Islamic Economics: An Appraisal", *JKAU: Islamic Economics*, 18 (2), 293-46.
- Zubair Hasan dan M. Fahim Khan (1985). "Macro Consumption Function in an Islamic Framework- Comments", *Journal of Research in Islamic Economics*, 2(2), 79-81.
- Zubair Hassan (2011). "Scarcity, Self-interest and Maximization from Islamic Angle", *MPRA Paper 31631*, Munich, Germany: University Library of Munich.